

ПОСЛЕДОВАНИЕ ВЕЧЕРНИ В ЧЕТВЕРТОК СВЕТЛЫЯ СЕДМИЦЫ

Поем настоящее последование, бывшее от господина Никифора Каллиста Ксанфопула: На Пресвятую Госпожу Владычицу Богородицу, Живоприемный Источник. Не бо обретохом в Типице сицеваго последования, но положиися любви ради Пресвятыя Богородицы.

Настоятель: Благословен Бог наш всегда, ныне и присно и во веки веков.

Лик: Аминь.

Настоятель поет тропарь во святом алтаре: Христос воскрес из мертвых, * смертию смерть поправ, * и сущим во гробех живот даровав. (Трижды.)

Лик: Христос воскрес из мертвых, смертию смерть поправ, и сущим во гробех живот даровав. (Трижды.)

Таже настоятель глаголет стихи:

Первый стих: Да воскреснет Бог, и расточатся врази Его, и да бежат от Лица Его ненавидящии Его.

Лик: Христос воскрес: единожды.

Второй стих: Яко исчезает дым, да исчезнут, яко тает воск от лица огня.

Лик: Христос воскрес: единожды.

Третий стих: Тако да погибнут грешницы от Лица Божия, а праведницы да возвеселятся.

Лик: Христос воскрес: единожды.

Четвертый стих: Сей день, егоже сотвори Господь, возрадуемся и возвеселимся воны.

Лик: Христос воскрес: единожды.

Слава:

Лик: Христос воскрес: единожды.

И ныне:

Лик: Христос воскрес: единожды.

Таже настоятель поет вышшим гласом: Христос воскрес из мертвых, смертию смерть поправ.

Лик: И сущим во гробех живот даровав.

Таже ектения великая от диакона: Миром Господу помолимся.

Возглас: Яко подобает Тебе всякая слава, честь и поклонение, Отцу и Сыну и Святому Духу, ныне и присно и во веки веков.

Лик: Аминь.

На Господи возвах: поставим стихов 10, и поем стихиры воскресны осмогласника, глас 6-й:

Стих: Изведи из темницы душу мою * исповедатися Имени Твоему.

Победу имеяй Христе юже на ада, * на крест возшел еси; * да во тьме смерти седящия воскресиши с собою, * иже в мертвых свободь; * источай живот от Своего света, * всеильне Спасе, помилуй нас.

Стих: Мене ждут праведницы, * дондеже воздаси мне.

Днесь Христос смерть поправ, * якоже рече, воскресе, * и радование миру дарова, * да вси взывающе песнь, тако рцем: * Источниче Жизни, Неприступный Свете, * Всеильне Спасе, помилуй нас.

Стих: Из глубины возвах к Тебе, Господи, * Господи, услыши глас мой.

Тебе, Господи, суцаго по всей твари, * грешнии камо бежим? * на Небеси сам живеши, * во аде попрал еси смерть; * во глубины морския? * тамо рука Твоя Владыко. * К Тебе прибегаем, * Тебе припадающе молимся: * Воскресый из мертвых, помилуй нас.

Ины стихиры восточны, глас 6-й:

Стих: Да будут уши Твои * внимающе гласу моления моего.

Крестом Твоим, Христе, хвалимся, * и Воскресение Твое поем и славим; * Ты бо еси Бог наш, * Разве Тебе иного не вемы.

Стих: Аще беззакония назириши, Господи, Господи, кто постоит? * яко у Тебе очищение есть.

Слава силе Твоей, Господи, * яко упразднил еси державу имущаго смерти, * обновил еси ны крестом Твоим, * даруяй нам жизнь и нетление.

Стих: Имене ради Твоего потерпех Тя Господи, потерпе душа моя в слово Твое, * упова душа моя на Господа.

Выну благословяще Господа, * поем воскресение Его, * Крест бо претерпев, * смертию смерть погуби.

Таже, стихиры Живоприемнаго Источника, глас 6-й:

Подобен: Все отложше:

Стих: От стражи утренния до ноци, от стражи утренния, * да уповает Израиль на Господа.

Странная и преславная, * Небес Владыка на Тебе совершаше изначала, Всенепорочная; * ибо свыше явственню укану, * якоже дождь во утробе Твоей, Богоневесто, * Источник Тя показуя, все благое вреющий, * обилие же исцелений, * благодеяния источающий всем независтно, * требующим крепости душ, и здравие телесе, * водою благодати.

Стих: Яко у Господа милость, и многое у Него избавление, * и Той избавит Израиля от всех беззаконий его.

Манну Тя небесную, * и рая, Дево, Источник Божественный, * именуую, Владычице, преискренне: * земли бо тече ток, * и благодать источника Твоего четверочастие ея покрывающая, * странными чудесы всегда, * и всем просимая бывает вода приемая. * Темже веселящися христоименитии, притекаем верно, * святыню черпаяще всегда сладкоточную.

Стих: Хвалите Господа вси языцы, * похвалите Его вси людие.

Струи исцелений источаеши, Дево, * верно притекающим источнику Твоему всегда, Богоневесто, * туне бо изливаеши, * обильно и богато недугующим исцеления; * слепыя видящия являеши ясно, приступающия к Тебе, * хромыя многия исправила еси, * и расслабленныя стягнула еси, * умерщвлена же оживила еси возлиянием трегубым, * неводненных и злодышущих страсти исцелила еси.

Стих: Яко утвердися милость Его на нас, * и истина Господня пребывает во век.

Странная и преславная, * Небес Владыка на Тебе совершаше изначала, Всенепорочная; * ибо свыше явственну укану, * якоже дождь во утробе Твоей, Богоневесто, * Источник Тя показуя, все благое вреующий, * обилие же исцелений, * благодеяния источающий всем неизвестно, * требующим крепости душ, и здравие телесе, * водою благодати.

Слава, глас 6-й:

Кто возглаголет силы Твоя, Источнице, * иже неистопаемыми чудесы изобилуяй, * многая и паче естества содеваеши исцеленьми? * Оле величий, яже всем изливаеши! * не токмо бо болезни неудобныя отгнала еси притекающих с любовию, * но и душевныя страсти измываеши очищающе, Всенескверная, * всем подающе велию милость.

И ныне, глас тойже:

Кто Тебе не ублажит, Пресвятая Дево? * кто ли не воспоет Твоего Пречистаго Рождества? * безлетно бо от Отца возсиявый Сын Единородный, * Тойже от Тебе, Чистыя, пройде, * неизреченно воплощся. * Естеством Бог Сый, * и естеством быв Человек нас ради; * не во двою лицу разделяемый, * но во двою естеству * неслитно познаваемый. * Того моли, Чистая, Всеблаженная, * помиловатися душам нашим.

Вход с кадилом. Свете тихий:

Прокимен великий, глас 7-й:

Возлюблю Тя Господи, Крепосте моя, * Господь утверждение мое.

Стих: Бог мой, помощник мой, и уповаю на Него.

Стих: Хваля призову Господа, и от враг моих спасуся.

Стих: Услыша от храма святаго своего глас мой.

Таже: Возлюблю Тя Господи, Крепосте моя:

Таже: Рцем вси: Сподоби Господи: и прочая.

На стиховне стихира воскресна, глас 6-й, осмогласника:

Воскресение Твое, Христе Спасе, * Ангели поют на небесех, * и нас на земли сподоби * чистым сердцем * Тя славити.

Таже, настоящая стихиры Богородицы, глас 5-й:

Подобен: Радуйся:

Радуйся, Живоносный Источнике, * по морям разливай чудеса на всю вселенную, * Океане умный, * Ниловы струи превосходяй изливанием благодати; * Силоаме второй, воду источай, аки от камене преславную, * Иорданово же приемый действо, * манно спасительная же, ясно бываемая, * ко ищущаго требованию богатая воистинну и независтная, * Христова Мати Отроковице, * изливающая мирови велию милость.

Стих: Освятил есть * селение свое Вышний.

Песньми чудными вернии Небесный Облак воспоим, * Каплю Небесную Живодавца Христа на землю нетленно одождившую, * живу скачущую, и источающую безсмертная, * воду Божественную, амвросию нектара, * никогдаже по питии истлевающая, * жажду же тающую души отгоняющая, * от негоже пиющим разумно, * токи Божественныя предлагаются от Умнаго Чрева, * точаща всем благодать независтную.

Стих: Речная устремления * веселят град Божий.

Радуйся, Живоприемный Источнике, * вечно источая благодати, * лияние исцелений, * всякую недугов крепость, * немощную и злую отгоняющее, * слепых воззрение и прокаженных Божественное очищение, * точащее недугов всякое врачевство, * всем притекающим верно к храму Твоему; * великая общая цельба, * безмездная воистинну и готовая, * Мати Христа Слова, * источающаго мирови велию милость.

Стих, глас 5-й: Да воскреснет Бог и расточатся врази Его.

Пасха священная нам днесь показася: * Пасха нова святая: * Пасха таинственная: * Пасха всечестная: * Пасха Христос Избавитель: * Пасха непорочная: * Пасха великая: * Пасха верных: * Пасха, двери райския нам отверзающая: * Пасха, * всех освящающая верных.

Стих: Яко исчезает дым, да исчезнут.

Приидите от видения, * жены благовестницы, * и Сиону рцыте: * приими от нас радости благовещения * Воскресения Христова: * красуйся, ликуй * и радуйся, Иерусалиме, * Царя Христа узрев из гроба, * яко жениха происходяща.

Стих: Тако да погибнут грешницы от Лица Божия, а праведницы да возвеселятся.

Мироносицы жены, * утру глубоку * предсташа гробу Живодавца, * обретоша Ангела * на камени сядяща, * и той, провещав им, * сице глаголаше: * что ищите Живаго с мертвыми? * Что плачете Нетленнаго во тли? * Шедше, * проповедите учеником Его.

Стих: Сей день, егоже сотвори Господь, возрадуемся и возвеселимся в онь.

Пасха красная, * Пасха, Господня Пасха! * Пасха всечестная нам возсия. * Пасха!
* Радостию друг друга обьемем. * О Пасха! * Избавление скорби, * ибо из гроба
днесь, * яко от чертога, * возсияв Христос, * жены радости исполни, глаголя: *
проповедите апостолом.

Слава, глас 5:

Вострубим празднующи в песнях, * воспоем в водах, и возликуем
радующеся, * вечными токами Живоносного Источника; * цари и князи да
стекаются, * и источника благодати да черпают независтно; * цари бо спасе, на одре
же содержимыя прикосновением возстави. * Пастырие же и вси дожденосный облак,
* спасительную воду спешесе почерпем: * иже в недужех, свобождение; * иже в
бедах, крепость; * прохлаждение, иже в жажде; * слепии очи, глусии благослышание,
* злостраждущии исцеление; * иже в смертех, живоносную; * вси повсюду верным
источающую воды спасения, * воспещуще сице воззовем: * присноживыя токи
изливающая от источника, Чистая, * не престай Дево всегда молящися о рабех
Твоих.

И ныне, глас 5-й:

Воскресения день, * и просветимся торжеством, * и друг друга обьемем. * Рцем:
братие, * и ненавидящим нас * простим вся Воскресением * и тако возопиим: *
Христос воскрес из мертвых, смертию смерть поправ и сущим во гробех живот
даровав.

Таже Христос воскрес: **трижды.**

Таже, диакон: Премудрость.

Лик: Благослови.

Настоятель: Сый благословен Христос Бог наш:

Лик: Аминь. Утверди, Боже:

Таже, настоятель, (вместо: Слава Тебе, Христе Боже)

Христос воскрес из мертвых, смертию смерть поправ:

Лик: И сущим во гробех живот даровав.

И отпуст.

В ПЯТОК СВЕТЛЫЯ СЕДМИЦЫ,

НА УТРЕНИ.

Иерей полагает поклон настоятелю, и отходит во святой олтарь, и взем кадильницу стоит перед святою трапезою, и кадит крестообразно, глаголя: Слава Святей и Единосущней: **И** начинает тропарь: во святом алтаре: Христос воскрес из мертвых, * смертию смерть поправ, * и сущим во гробех живот даровав. (Трижды.)

Лик: Христос воскрес из мертвых, смертию смерть поправ, и сущим во гробех живот даровав. (Трижды.)

Таже настоятель глаголет стихи:

Первый стих: Да воскреснет Бог, и расточатся врази Его, и да бежат от Лица Его ненавидящии Его.

Лик: Христос воскрес: единожды.

Второй стих: Яко исчезает дым, да исчезнут, яко тает воск от лица огня.

Лик: Христос воскрес: единожды.

Третий стих: Тако да погибнут грешницы от Лица Божия, а праведницы да возвеселятся.

Лик: Христос воскрес: единожды.

Четвертый стих: Сей день, егоже сотвори Господь, возрадуемся и возвеселимся вонь.

Лик: Христос воскрес: единожды.

Слава:

Лик: Христос воскрес: единожды.

И ныне:

Лик: Христос воскрес: единожды.

Таже настоятель поет вышшим гласом: Христос воскрес из мертвых, смертию смерть поправ. **И** отверзает врата.

Лик: И сущим во гробех живот даровав.

Таже ектения великая от диакона: Миром Господу помолимся.

Канон, глас 1-й:

Песнь 1.

Ирмос: Воскресения день, * просветимся, людие: * Пасха, Господня Пасха! * От смерти бо к жизни * и от земли к небеси * Христос Бог нас преведет, * победную поющия.

Припев: Христос воскрес из мертвых.

Очистим чувства * и узрим неприступным светом Воскресения * Христа блистающуюся, * и радуйтеся рекуща, * ясно да услышим, * победную ноюще.

Небеса убо достойно да веселятся, * земля же да радуется, * да празднует же мир, * видимый же весь и невидимый: * Христос бо воста, веселие вечное.

И Богородицы на 6, егоже краестрочие: Никифору Каллисту ту Ксанфопулу.

Стих: Пресвятая Богородице, спаси нас

Ныне источи ми, * Дево Богородице, * источниче, благодать дающи слова, * яко да воспую Тя источник, * вреющий живот и благодать верным: * Ты бо ипостасное Слово источила еси.

Врачевство паче естества, * храм Твой, Честная, * является всем, Отроковице: * от смерти бо явныя притекающия верныя, * яве возставляет, * и всем независтную точит сладость.

Изливаеши с Небесе неистошимо * благодати воистинну едина: * слепеюща бо твориши взирати к свету, блатом новым, * возгласивши свыше паче смысла Леонови.

Общее любочестие человечества, Честная, * радуйся, Марие, радуйся: * всех бо Творец на Тя, * якоже капля сниде явственно, * источник Тя безсмертен показав, Богоневестная.

Катавасия: Воскресения день, * просветимся, людие: * Пасха, Господня Пасха! * От смерти бо к жизни * и от земли к небеси * Христос Бог нас преведе, * победную поющия.

Песнь 3.

Ирмос: Приидите, пиво прием новое, * не от камене неплодна чудодеемое, * но нетления источник, * из гроба одождивша Христа, * в Немже утверждаемся.

Ныне вся исполнишася света, * небо же и земля, и преисподняя: * да празднует убо вся тварь * востание Христово, * в немже утверждается.

Вчера спогребохся Тебе, Христе, * совостаю днесь воскресшу Тебе, * сраспинахся Тебе вчера. * Сам мя спрослави, Спасе, * во Царствии Твоем.

Богородицы подобны:

Светлый Тя святыи храм * Владыки всех, Отроковице, вем * и нетления источник, * воду изливающ Христа, * от негоже напаяемся.

От Твоя благодати, Владычице, источниче, * самодержцу даеши * исходов происхождение содержимо люте, * камене подстояние страшное, * водою разрешившееся.

Течет благодать независтная * от Тебе, Богородице Дево, * обильно точащая, * хромии скажут о Тебе, * прокаженных очищается множество, * и демони угнетаются.

Всем даеши исцеление верным, * царем, простцем, нищим, * князем, убогим, богатым обще, * воду изливаяй, источниче, * различное исцеление.

Катавасия: Приидите, пиво прием новое, * не от камене неплодна чудодеемое, * но нетления источник, * из гроба одождивша Христа, * в Немже утверждаемся.

Кондак Пасхи, глас 8-й:

Аще и во Гроб снизшел еси, Безсмертне, * но адову разрушил еси силу * и воскресл еси, яко Победитель, Христе Боже, * женам мироносицам вещавый: радуйтесь! * и Твоим апостолом мир даруяй, * падшим подай воскресение.

Седален, глас 8-й:

Подобен: Премудрости слова:

Приснотекущий источник и животный, * источай струя Божественный ток, * согласно восхвалим благодати просяще: * на кийждо бо день источает исцеления, * яко рек течения показуй малейшая. * Темже по долгу приступающе с любовию, * верно почерпем от источника * неисчерпаемое здравие, воистинну безсмертное, * орошающее верно благочестивых сердца, * устнами возопиим: Ты еси верных утешение.

Песнь 4.

Ирмос: На Божественной стражи * богоглаголивый Аввакум * да станет с нами и покажет * светоносна Ангела, * ясно глаголюща: * днесь спасение миру, * яко воскресе Христос, * яко Всесилен.

Мужеский убо пол, * яко разверзый девственную утробу, * явился Христос: * яко человек же, * Агнец наречеся: * непорочен же, * яко невкусен скверны, * наша Пасха, * и яко Бог истинен * совершен речеся.

Яко единоклетный агнец, * благословенный нам венец Христос, * волею за всех заклан бысть, * Пасха чистительная, * и паки из гроба красное * правды нам возсия Солнце.

Богоотец убо Давид, * пред санным ковчегом * скакаше играя, * людие же Божии святии, * образов сбытие зряще, * веселимся Божественне, * яко воскресе Христос, * яко Всесилен.

Богородицы подобны:

Паче песка воистинну, * и каплей дождевых * быша, Богородице, * множества источника дел Твоих, * непрестанно текущая на всю землю богато, * и всякого боляща люте * скоро исцеляющая.

На стесненный жены от каркина сосец * вода возливается, Дево, * источника Твоего, Владычице, * и абие престапа * страсти смертоносныя струею, * и каркин просто изыти позна.

Недомыслимое в Тебе, * и паче естества содеянное есть * явственно, Богородице: * вода бо бывает источника Твоего * исцеление, недугом смертоносным противное, * егоже естество яве никогдаже ведяше.

Присно умерщвляет мя враг * сладными прилоги, * Владычице источниче Богородице: * не презри, предвари, скорая помощи, * сего же сетей мя избави, * да воспую Тя присно многопетую.

Катавасия: На Божественной стражи * богоглаголивый Аввакум * да станет с нами и покажет * светоносна Ангела, * ясно глаголюща: * днесь спасение миру, * яко воскресе Христос, * яко Всесилен.

Песнь 5.

Ирмос: Утреннем утреннюю глубоку * и вместо мира песнь принесем Владыце, * и Христа узрим правды Солнце, * всем жизнь возсияющая.

Безмерное Твое благоутробие, * адовыми узами содержимии зряще, * к свету идяшу, Христе, * веселыми ногами, * Пасху хваляще вечную.

Приступим, священоснии, * исходящу Христу из гроба, яко жениху, * и спразднуем любопраздственными чинми * Пасху Божию спасительную.

Богородицы подобны:

Глаголанная, Дево Отроковице, * источника Твоего воистинну чудеса * ужасают человек помышление: * паче бо естества суть, * вся верная освящающая.

Повествова руно, манна, и Силоам, * и камень точащ, Соломонов притвор, * благодать Твою, * иорданския воды, * и источник Самаряныни.

Капли Твоя, Отроковице Дево, яже источника, * и мертвого оживиша, * паче слова содеянное и смысла: * вся бо Твоя, Всечистая, * слово побеждают человеческое.

Страсти моя, Отроковице, исцели, * кровотечения источник изсушаючи, * и лютое пламене возжжение, * и здравия преложение, * исходов союз, и чреватечение.

Катавасия: Утренюем утреннюю глубоку * и вместо мира песнь принесем Владыце, * и Христа узрим правды Солнце, * всем жизнь возсияюща.

Песнь 6.

Ирмос: Снизшел еси в преисподняя земли * и сокрушил еси верей вечныя, * содержащая связанныя, Христе, * и тридневен, яко от кита Иона, * воскресл еси от гроба.

Сохранив цела знамения, Христе, * воскресл еси от гроба, * ключи Девы не вредивый в рождестве Твоем, * и отверзл еси нам райския двери.

Спасе мой, * живое же и нежертвенное закование, * яко Бог Сам Себе * волею привел Отцу, * совоскресил еси всероднаго Адама, * воскрес от гроба.

Богородицы подобны:

Словеса Слова, * яко воистинну источника, * воспеваем Тя, Чистая: * премудрости бо глубину яко паче слова раждаеши, * повесивша на воздухе течения, * и землю на воде.

Подшла еси лествиц несение, * отъемлющее сокрушение * иже тамо живописцев. * О, Всесвятый Источниче, * спасай люди от труса дому падшия.

Утробы нерождаящая неплодством прежде, * разрешаеши яве источника Твоего струями: * ибо, яко родившая Владыку всех, * и рождения подаеши.

Ни слово, ни ум, ниже язык * Твое возмогут, Чистая, рождество похвалити, * но немощствуют в Тебе, * и обличается философов честность, * и риторов красота.

Катавасия: Снизшел еси в преисподняя земли * и сокрушил еси верей вечныя, * содержащая связанныя, Христе, * и тридневен, яко от кита Иона, * воскресл еси от гроба.

Кондак, глас 8-й:

Подобен: Взбранной:

От неистошимыя Ты, источниче Богоблагодатный, * подаеши ми, точащи воды Твоя благодати, * приснотекущий паче слова. * Яко бо Слово рождающая паче смысла, * молю ти ся, ороси мя благодатию, да зову ти: * радуйся, водо спасительная.

Икос: Нескверная Богородице, рождающая Слово Отчее, * прежде век нетленно рождающаяся, * разшири моя уста, Чистая, * спривносящи мя к Твоему похвалению, * яко да восхваляю Тя, зовый источнику Твоему сия: *

Радуйся, источнице радости неприестаемя,

Радуйся, точе доброты неизреченныя.

Радуйся, недугов различных разрешение,

Радуйся, страстей всяких потопление.

Радуйся, струе световиднейшая, здравы творящая верныя,

Радуйся, водо благодатнейшая недугующим многообразно.

Радуйся, чаше манны животочныя,

Радуйся, бане и нектарю Богоизлиянный.

Радуйся, водо премудрости, неведение отъемлющая,

Радуйся, растворение сердца пищу Божественную изливающеее.

Радуйся, пристанище немощения источающая,

Радуйся, пламень недугования уташающая.

Радуйся, вода спасительная.

Таже глаголем, глас 6-й:

Воскресение Христово видевши, * поклонимся Святому Господу Иисусу, * Единому Безгрешному. * Кресту Твоему покланяемся, Христе, * и святое Воскресение Твое поем и славим: * Ты бо еси Бог наш, * разве Тебе иного не знаем, * имя Твое именуем. * Приидите, вси вернии, * поклонимся святому Христову Воскресению: * се бо прииде Крестом радость всему миру. * Всегда благословяще Господа, * поем Воскресение Его: * распятие бо претерпев, * смертию смерть разруши. [Трижды.]

Воскрес Иисус от гроба, * якоже прорече, * даде нам живот вечный * и велию милость. [Трижды.]

Песнь 7.

Ирмос: Отроки от печи избавивый, * быв Человек, * страждет яко смертен, * и страстию смертное * в нетления облачит благолепие, * Един благословен * отец Бог и препрославлен.

Жены с мира богомудрыя * в след Тебе течаху: * Егоже, яко мертв, со слезами искаху, * поклонившася радующияся Живому Богу, * и Пасху тайную * Твоим, Христе, * учеником благовестиша.

Смерти празднуем умерщвление, * адово разрушение, * иного жития, вечного, начало, * и играюще поем Виновного, * Единого благословенного * отец Бога * и препрославленного.

Яко воистинну священная * и всепразднственная сия спасительная ночь, * и светозарная, * светоноснаго дне, * востания сущи провозвестница: * в нейже безлетный Свет * из гроба плотски всем возсия.

Богородицы подобны:

Почерпите недугующии исцеления: * Всечистая бо точит * от Божественного источника сладость истинную, * поток сладости воистинну вреющий. * Темже и верою токи независтныя почерпем вси.

Удивляют слышания Владычице, * странная Твоя чудеса, вся верныя: * немья бо и глухия, * яко благоглаголивая показывает вода Твоя, * страждущия же люте врачует, * и исцеление дарует.

Возводиши от печи скорбей, * орошаючи водами от странного источника, * приступающия к Тебе, Чистая: * каркинския бо раны свободяется человек, * прокаженна же исцеляеши, * и распаление угасила еси.

Юноши и отроковицы Владычицу, * и вси человецы верою от души восхвалим светло: * сокрушения бо гноевиц, * и вреды лукавых, и отоки,/и разслабленного исцели.

Песнь 8.

Ирмос: Сей нареченный и святой день, * Един суббот Царь и Господь, * праздников праздник * и торжество есть торжеств: * воньже благословим Христа во веки.

Приидите, новаго винограда рождения, * божественного веселия, * в нарочитом дни Воскресения * Царствия Христова приобщимся, * поюще Его * яко Бога во веки.

Возведи окрест очи твои, Сионе, и виждь: * се бо приидоша к тебе, * яко богосветлая светила, * от запада и севера, и моря, * и востока чада твоя, * в тебе благословящая Христа во веки.

Троицен: Отче Вседержителю, и Слове, и Душе, * трети соединяемое во Ипостасех Естество, * Пресущественне и Пребожественне, * в Тя крестихомся и Тя благословим во вся веки.

Богородицы подобны:

Божественную источник и честную воду изливает Твой, Дево: * водных бо течение вспящает зело, * призыванием Божественным благодати. * Темже Тя почитаем, источниче, во веки.

Вси честную животочную воду воспоим мудренне: * злодыхания бо ток по странам уставляет, * и свободное творит происхождение. * Оле, Твоих чудес, * Чистая Богородительнице!

Кая, Всепетая, * восхвалят уста Рождества Твоего странное? * но и ум кий бы чудес источник изследовал, * и слово изглаголало? * несть естеству крепость, Твоим чудитися.

Вся о Тебе смерти держава разорися внезапно, * о, Царице и Госпоже! * Ибо Царя Безсмертнаго живот Ты источила еси воду, * манну, Христа во веки.

Катавасия: Сей нареченный и святой день, * Един суббот Царь и Господь, * праздников праздник * и торжество есть торжеств: * воньже благословим Христа во веки.

Песнь 9.

Ирмос: Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

О Божественнаго, о любезнаго, * о сладчайшаго Твоего гласа! * С нами бо неложно * обещался еси быти * до скончания века, Христе: * Егоже, вернии, * утверждение надежды имуще, радуемся.

О Пасха велия и священнейшая, Христе! * О мудросте и Слове Божий, и сило! * Подавай нам истее Тебе причащатися * в невечернем дни Царствия Твоего.

Богородицы подобны:

Воды вся превосходит, * Отроковице Чистая, * источника Твоего вода, * яве дарующая свобождения недугов лютых, * и душам всякое здравие, * яко паче естества изливаемая.

Решитель недугов, * новый се Силоам, * источника Твоего, Дево, зрим вси: * очи бо приемлет огня, * вси же здравие присно к животу приемлем.

Здравия ищущии притецйте ко источнику, * Отроковица бо Дева жительствует при воде. * Ликуй и веселися верных множество сице, * якоже подобает: * приидет к храму, * и воздаяние прошений приемлет.

Возвысися источника Твоего вода выше Небес, * и земли бездны токи претече: * сия есть пища души, * питье верных, мед из камене, * и манны раздаяние.

Веселиши, Дево, царя преестественне, * источающи благодать от источника присносущную, * сему подавающи на враги крепость, * победы присно, здравие и мир, * и прошений исполнение.

Катавасия: Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Ексапостиларий. Самогласен:

Плотию уснув, * яко мертв. * Царю и Господи, * тридневен воскресл еси, * Адама воздвиг от тли * и упразднил смерть: * Пасха нетления, * мира спасение.

Слава, и ныне, и Источнику:

Источник еси воистинну воды живыя, Владычице: * измываеши убо недуги душ и телес лютыя, * прикосновением Твоим единым токмо, * воду спасения Христа * изливающи.

На хвалитех, Всякое дыхание: поставим стихов 8.

И поем стихиры осмогласника 4, глас 6-й:

Стих: Сотворити в них суд написан, * слава сия будет всем преподобным Его.

Крест Твой Господи, / жизнь и Воскресение людем Твоим есть, * и нань надеющися, * Тебе воскресшаго Бога нашего поем, помилуй нас.

Стих: Хвалите Бога во святых Его, * хвалите Его во утвержении силы Его.

Погребение Твое, Владыко, * рай отверзе человеческому роду; * и от тли избавльшися, * Тебе воскресшаго Бога нашего поем, помилуй нас.

Стих: Хвалите Его на силах Его, * хвалите Его по множеству величества Его.

Со Отцем и Духом Христа воспоим * воскресшаго из мертвых, * и к Нему возопиим: * Ты еси Жизнь наша и Воскресение, помилуй нас.

Стих: Хвалите Его во гласе трубнем, * хвалите Его во псалтири и гуслех.

Тридневен воскресл еси Христе из гроба, * якоже есть писано, * совоздвигнувший праотца нашего: * темже Тя и славит род человеческий, * и поет Твое Воскресение.

И Богородицы стихиры, глас 2-й:

Подобен: Доме Евфрафов:

Стих: Хвалите Его в тимпане и лице, * хвалите Его во струнах и органе.

Вода Источника, * спасительная есть * всем немощствующим; * приступим верою, * благодать почерпем.

Стих: Хвалите Его в кимвалех доброгласных, хвалите Его в кимвалех восклицания. * Всякое дыхание да хвалит Господа.

Кладязь Живооточный * Источника безсмертнаго * приступающим любовию * исцелений подает * излиание неисчерпаемое.

Стих: Осветил есть * селение Свое Вышний.

Укрепляет души * вода Девыя; * иже в сквернах страстей, * притецем ко Отроковице, * и сия измоем.

Стих: Речная устремления * веселят град Божий.

Ручка священная, * и Манна независтная, * из Пречистыя утробы * изливает Владыку: * потребу всяческую почерпем.

Стих, глас 5-й: Да воскреснет Бог и расточатся врази Его.

Пасха священная нам днесь показася: * Пасха нова святая: * Пасха таинственная: * Пасха всечестная: * Пасха Христос Избавитель: * Пасха непорочная: * Пасха великая: * Пасха верных: * Пасха, двери райския нам отверзающая: * Пасха, * всех освящающая верных.

Стих: Яко исчезает дым, да исчезнут.

Приидите от видения, * жены благовестницы, * и Сиону рцйте: * приими от нас радости благовещения * Воскресения Христова: * красуйся, ликуй * и радуйся, Иерусалиме, * Царя Христа узрев из гроба, * яко жениха происходяща.

Стих: Тако да погибнут грешницы от Лица Божия, а праведницы да возвеселятся.

Мироносицы жены, * утру глубоку * предсташа гробу Живодавца, * обретоша Ангела * на камени сидяща, * и той, провещав им, * сице глаголаше: * что ищите Живаго с мертвыми? * Что плачете Нетленного во тли? * Шедше, * проповедите учеником Его.

Стих: Сей день, егоже сотвори Господь, возрадуемся и возвеселимся в онь.

Пасха красная, * Пасха, Господня Пасха! * Пасха всечестная нам возсия. * Пасха! * Радостию друг друга обьемем. * О Пасха! * Избавление скорби, * ибо из гроба днесь, * яко от чертога, * возсияв Христос, * жены радости исполни, глаголя: * проповедите апостолом.

Слава, и ныне, глас 5-й:

Воскресения день, * и просветимся торжеством, * и друг друга обьемем. * Рцем: братие, * и ненавидящим нас * простим вся Воскресением * и тако возопиим: * Христос воскресе из мертвых, смертию смерть поправ и сущим во гробех живот даровав.

Таже Христос воскресе: трижды.

И ектении, и отпуст.

ЧАСЫЙ.

Наченшу иерею: **Благословен Бог наш: Лик: Аминь.** Христос воскрес из мертвых, смертию смерть поправ, и сущим во гробех живот даровав. **[Трижды]**

Таже глаголем:

Воскресение Христово видевши, * поклонимся Святому Господу Иисусу, * Единому Безгрешному. * Кресту Твоему покланяемся, Христе, * и святое Воскресение Твое поем и славим: * Ты бо еси Бог наш, * разве Тебе иного не знаем, * имя Твое именуем. * Приидите, вси вернии, * поклонимся святому Христову Воскресению: * се бо прииде Крестом радость всему миру. * Всегда благословяще Господа, * поем Воскресение Его: * распятие бо претерпев, * смертию смерть разруши. **[Трижды.]**

Таже ипакои, глас 4-й: единощи:

Предварившия утро яже о Марии, * и обретшия камень отвален от гроба, * слышаху от Ангела: во свете присносущнем Суцаго * с мертвыми что ищете, яко человека? * Видите гробныя пелены, * тецете и миру проповедите, * яко воста Господь, умертвивый смерть, * яко есть Сын Бога, спасающаго род человеческий.

Таже кондак, глас 8-й: единощи:

Аще и во гроб снизшел еси, Безсмертне, * но адову разрушил еси силу и воскресл еси, яко победитель, Христе Боже, * женам мироносицам вещавый: радуйтесь, * и Твоим апостолом мир даруйай, падшим подай воскресение.

Таже и сей тропарь единощи:

Во гробе плотски, во аде же с душею яко Бог, * в раи же с разбойником, и на Престоле был еси Христе, со Отцем и Духом, * вся исполняяй Неописанный.

Слава:

Яко Живоносец, яко рая краснейший, * воистинну и чертога всякаго царскаго показася светлейший, Христе, гроб Твой, * источник нашего воскресения.

И ныне, Богородичен:

Вышняго освященное Божественное селение, радуйся. Тобою бо дадеса радость, Богородице, зовущим: благословенна Ты в женах еси, Всенепорочная Владычице.

Таже Господи, помилуй, 40. **Слава, и ныне: Честнейшую Херувим: Именем Господним благослови, отче. Иерей: Молитвами святых отец наших: Мы же речем: Аминь. И паки глаголем подобне: Христос воскрес: трижды. Слава, и ныне: Господи, помилуй. Трижды. Благослови. И отпуст первого часа.**

НА ЛИТУРГИИ

Антифоны Пасхи.

Антифон 1, псалом 65, глас 2-й:

Стих 1: Воскликните Господеву вся земля.

Припев: Молитвами Богородицы, Спасе спаси нас.

И другой лик тойжде стих: Воскликните Господеву вся земля, пойте же имени Его, дадите славу хвале Его.

Молитвами Богородицы, Спасе спаси нас.

Стих 2: Рцыте Богу: коль страшна дела Твоя, во множестве силы Твоя солжут Тебе врази Твои.

Молитвами Богородицы, Спасе спаси нас.

Стих 3: Вся земля да поклонится Тебе, и поет Тебе, да поет же имени Твоему Вышний.

Молитвами Богородицы, Спасе спаси нас.

Слава, и ныне: Купно оба лика вышшим гласом:

Молитвами Богородицы, Спасе спаси нас.

Таже, ектенна малая.

Антифон второй, псалом 66, глас тойже.

Стих 1: Боже ущедри ны и благослови ны.

Припев: Спаси ны Сыне Божий, воскресый из мертвых, поюция Ти: Аллилуиа. единожды.

Другая страна, тойже стих: Боже, ущедри ны, и благослови ны, просвети лице Твое на ны, и помилуй ны.

Спаси ны Сыне Божий:

Стих 2: Да познаем на земли путь Твой, во всех языцех спасение Твое.

Спаси ны Сыне Божий:

Стих 3: Да исповедятся Тебе людие Боже, да исповедятся Тебе людие вси.

Спаси ны Сыне Божий:

Слава, и ныне: вкупе два лика: Единородный Сыне:

Таже, ектенна.

Антифон 3-й, псалом 67, глас 5-й:

Стих 1: Да воскреснет Бог, и расточатся врази Его.

Тропарь: Христос воскрес из мертвых:

Стих: Да воскреснет Бог, и расточатся врази Его, и да бежат от лица Его ненавидящии Его.

Христос воскрес:

Стих 2: Яко исчезает дым, да исчезнут, яко тает воск от лица огня.

Христос воскрес:

Стих 3: Тако да погибнут грешницы от лица Божия, а праведницы да возвеселятся, да возрадуются пред Богом.

Христос воскрес:

И бывает вход. И возглашает диакон, аще есть, аще же ни, иерей:

Премудрость, прости.

Входное: В церквах благословите Бога, Господа от источник Израилевых.

Тропарь: Христос воскрес:

Слава: кондак, глас 8-й:

Аще и во гроб снизшел еси, Безсмертне, * но адову разрушил еси силу и воскресл еси, яко победитель, Христе Боже, * женам мироносицам вещавый: радуйтесь, * и Твоим апостолом мир даруйай, падшим подай воскресение.

И ныне: кондак, глас 8-й:

От неистошимья Ты, источниче Богоблагодатный, * подаеши ми, точащи воды Твояе благодати, * приснотекущий паче слова. * Яко бо Слово рождаша паче смысла, * молю ти ся, ороси мя благодатию, да зову ти: * радуйся, водо спасительная.

Вместо же Трисвятаго: Елицы во Христа крестистесь, * во Христа облекостесь: * аллилуиа.

Прокимен, глас 8-й:

Во всю землю изыде вещание их, * и в концы вселенныя глаголы их.

Стих: Небеса поведают славу Божию, творение же руку Его возвещает твердь.

Ин прокимен, песнь Богородицы глас 3-й: Величит душа Моя Господа, и возрадовася дух Мой о Бозе Спасе Моем.

Апостол в деяниях, зачало 7-е:

(за? з7) Во дни оны, вкупе Петр и Иоанн восхождаста во святилище на молитву в час девятый. И некий муж, хром от чрева матери своея сый, носимъ бываше, егоже полагаху по вся дни пред дверьми церковными, рекомыми Красными, просити милостыни от входящих в церковь. Иже видев Петра и Иоанна хотящия внити в церковь, пропаше милостыни. Возрев же Петр нань со Иоанном, рече: воззри на ны. Он же прилежаше има, мня нечто от нею прияти. Рече же Петр: сребра и злата несть у мене, но еже имам, сие ти даю, во имя Иисуса Христа Назореа востани и ходи. И емь его за десную руку воздвиже, абие же утвердистесь его плесне и глезне, и вскочив ста и хождаше, и вниде с нима в церковь, ходя и скача и хваля Бога.

И Богородицы, к Филипписием, зачало 240-е.

(за? СМ) Братие, сие да мудрствуется в вас, еже и во Христе Иисусе, Иже во образе Божии сый, не восхищением непщева быти равен Богу. Но Себе умалил, зрак раба приим, в подобии человечестем быв, и образом обретесь якоже человек. Смирил Себе, послушлив быв даже до смерти, смерти же крестныя. Темже и Бог Его превознесе и дарова Ему имя, еже паче всякаго имени, да о имени Иисусове всяко колена поклонится небесных и земных и преисподних, и всяк язык исповестъ, яко Господь Иисус Христос в славу Бога Отца.

Аллилуия, глас 1: Исповедят небеса чудеса Твоя, Господи.

Стих: Бог прославляем в совете святых.

Стих: Слыши Дщи и виждь, и приклони ухо Твое.

И чтем Евангелие от Иоанна, зачало 7-е.

(за? з7) Во время оно, сниде Иисус в Капернаум Сам и Мати Его, и братия Его и ученицы Его, и ту не многи дни пребыша. И близ бе Пасха иудейска, и взыде во Иерусалим Иисус и обрете в церкви продающыя овцы и волы и голуби, и пеняжники сядящыя. И сотвори бичь от вервий, вся изгна из церкви, овцы и волы, и торжником разсыпа пенязи и дски опроверже. И продающим голуби рече: возьмите сия отсюда и не творите дому Отца Моего дому купленаго. Помянуша же ученицы Его, яко писано есть: жалость дому Твоего снесть Мя. Отвещаша же иудее и реша Ему: кое знамение являеши нам, яко сия твориши? Отвеща Иисус и рече им: разорите церковь сию, и тремя деньми воздвигну ю. Реша же иудее: четыредесять и шестию лет создана бысть церковь сия, и Ты ли тремя деньми воздвигнеши ю? Он же глаголаше о церкви тела Своего. Егда убо воста от мертвых, помянуша ученицы Его, яко се глаголаше, и вероваша Писанию и словеси, еже рече Иисус.

И Богородицы, от Луки, зачало 54-е.

(за? н7д) Во время оно, вниде Иисус в весь некую, жена же некая именем Марфа прият Его в дом свой. И сестра ей бе нарицаемая Мария, яже и седши при ногу Иисусову, слышаше слово Его. Марфа же молвяше о мнозе службе, ставши же рече: Господи, не брежеш ли, яко сестра моя едину мя остави служити; рцы убо ей, да ми поможет. Отвещав же Иисус, рече ей: Марфо, Марфо, печешися и молвиши о мнозе. Едино же есть на потребу. Мария же благую часть избра, яже не отыметя от нея. Бысть же егда глаголаше сия, воздвигши некая жена глас от народа, рече Ему: блажено чрево носившее Тя, и сосца, яже еси ссал. Он же рече: темже убо блажени слышавшии слово Божие, и храняще е.

Вместо же Достойно, поем:

Ирмос: Ангел вопияше Благодатней: Чистая Дево радуйся, и паки реку, радуйся: Твой Сын воскресе тридневен от гроба, и мертвыя воздвигнувый: людие веселитесь. Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Причастный: Тело Христово примите, источника безсмертнаго вкусите.

И Богородице: Чашу спасения прииму, и Имя Господне призову, аллилуиа. [трижды].